

A MAMMA

Bell'est sa die, bellu su momentu,
candho ti penso, mamma, ca t'adoro;
ses ~~me~~ prendha impremida in su coro,
ses de sa vida mia s'alimentu.

Perun'istella in s'altu firmamentu
superare ti poded'in decoro:
non b'hat marmaru dignu ne tesoro
pro ti fagher eternu monumentu.

Non b'had'in s'universu un'elementu
ch'hapas' ~~xxxxx~~ pprofumu, melodia e bellezza
ch'haped'amore, incantu, simpatia

che tue! Tue sola, mamma mia,
ses funtana 'e virtude e nobileza,
ses de su coro meu gosu e turmentu!

Cantadore pellegrinu

A DOMINIGU E MARIA

Sas undhas t'hana idu pellegrinu
bramidu 'e pane e de felizidade;
carignos t'hana dadu in cantidade
cun mulmuttos, Dóminigu, in caminu.

Su chelu infinitu, cristallinu,
basos ti ha donadu in mansáada amistade
e, premiu pro sa tua onidade,
t'ha preparadu lughidu destinu.

Giradu ndh'has de terras de incantós
chi sos giardinios suos t'hana abbeltu;
ma in s'Isola ricca 'e poesia

de runaghes antigos e de Santos,
in gentile giardinu has iscobeltu
sa cumpagna 'e sa vida ch'est Maria.

++++++ ++++++

Cantas undhas, edducas, b'hada in mare,
cantas istellas lughen in su chelu,
cantos puntos cun s'agu han postu in telu
dies felices potedas gosare.

Sa dom'ostra potedas adornare
de quadros viventes. Un' anghélu
de umbras allontanet dogni velu
chi solet vida umana accompagnare.

Siedas duas lughidas bandhelas
aunidas in magica iscogliera
caras a sole ardente, a bianca luna.

Salude e paghe siana sas velas,
siat su mare eterna primavera
ue andhedas cun bona fortuna.

Cantadore pellegrinu

A S'ISPIGA

=====

O ispiga, lughida, chei s'oro,
has profumos de lagrimas e dolu,
has mulmuttos de limpiu rizolu,
has carignos de sole, asos de coro.

T'amo ca ses amabile tesoro
de custa terra e umile consolu:
paret chi milli anghelos in bolu
t'hapan dadu ricamos e decoro.

Ti messo cun sa fronte cunsagrada
'e suore; t'ispozo ei su ranu
istringo e lu aso cun amore.

Isse mi paret teneru fiore
chi brillat e m'imperelat sa manu
ch'est gai de fadigas premiada.

Cantadore pellegrinu